




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## Faapaiaina le Malumalu Fou i Vini-fou

O la le fai Salamo..”Na ou fiafia ina ua latou fai mai ia te a’u, tatou o i le fale o le Alii,” E faapena se lagona o lenei Ekalesia to’a gaogao, le EFKS i Vinifou, Pulega a Apia Sasae, Matagaluega a Apia, ina ua  
*faaauau itulau e 2*

**O LE ATA** - O ata o le malumalu tuai ma le malumalu fou o le aulotu i Vinifou oloo faamatalaina i le Sulu lenei.

### Ua tuu e le Ta’ita’i Iana fanau i le Atua

E 21 tausaga o o’u faigaluega i le Matagaluega a le Palemia i Samoa. O ia tausaga uma na ou maua ai ni a’oa’oga taua mai  
*itulau e 6*

### O le Mafuaaga o le pese: To God be the Glory

O le ofoina atu o viiga i le Atua, o le sini aupito moomia lava lea o soo se Kerisiano. E le gata o le faamoemoe silisili  
*faaauau itulau e 8*



### O le Meaalofa mai le Uso

Na maua e la’u uo o Paulo se meaalofa mai lona uso mo le Kerisimasi. O le afiafi o le aso e sosoo ma le Kerisimasi, e  
*faaauau itulau e 10*

### E toe pepese foi manulele i isi lalolagi

O le matou aiga o se tasi o aiga i lo matou nuu na muamua lava  
*faaauau itulau e 10*

---

# Faapaiaina le Malumalu Fou i Vini-fou

*mai le itulau muamua*

faapaiaina ma faaulufaleina lo matou malumalu fou, i le Aso Faraile 15 Aokuso 2014. Ma ou te fiafia e faailoa atu sina tala otooto o la matou galuega sa feagai ai, ma momoli ai le faafetai tele i le mamalu o le Ekalesia. Faapotopotoga Kerisiano Samoa aemaise le paia o le valaaulia na mafai ona faatasi mai i lea aso taupoina

## Tala o le Galuega:

Na a'e se manatu o lenei aulotu i lana fono i le Aso Sa 17 Iulai 2011, ina ia fausia se malumalu fou, ona ua le saogalemu lo matou malumalu tapua'i tuai sa iai, le Punaoleola.

O iugafono muamua lava la sa pasia e le Ekalesia a o sauni atu i ana sailiga seleni mo le faamoemoe, o le faia lea o se mafutaga tatalo i vaveao o AsoToonai uma e talosia ai le lima vaivai ma le to'a gaogao o le Ekalesia, a o sauni atu i lenei galuega tele. Ma sa faapea lava ona faia i totonu o le Punaoleola tuai, sei oo mai ina ua tuuina ifo i lalo i le Aso 28 Ianuari 2014.

Na laualuga i manatu o lenei Ekalesia, le tagiilima pea o ana lava sailiga seleni, e aunoa ma se faamoemoe atu i se nogatupe poo se 'loan', i le pe faalagolago ma tagi atu foi i se fesoasoani mai le Ekalesia Aoao. E ma'eu lava le loto talitonu ma le faatuatua moni, i le alofa ma le agalelei o le Atua.

O a matou sailiga tupe e aofia ai - golf tournament, Bingo, Raffle, CD pese, Sene Faapitoa, i le ma le 'Direct contribution'

(loto fuatia ifo lelei a le tagata faigaluega, e sau sa'o lava mai lona totogi, i le teugatupe 'account' a le Ekalesia mo le falesa fou), taluai, e 98% o matafale o le Ekalesia, e faigaluega uma.

O nisi o meaalofo tupe e auala eseese mai i le alofa ma le agalelei o le Atua, na fai meaalofo ma fai taulaga mai ai mo le falesa fou i latou e pei ona ta'ua:

1. Le tama ma le tina penisione malolo, le Toeaina ia Samuelu ma Tima Tui'ai ma le aiga, le Toeaina ia Tauaana ma Reeta Mataafa ma le fanau, na foa'i mai ai le \$20,000, o se tasi lava o matafale faaopoopo o lenei aulotu mai Brisbane i Ausetalia.

2. Na fai meaalofo foi le tina ma le fanau e manatua ai le tama matua, le A'oa'o Fesoasoani poo le Tiakono Toeaina ia Misa Piki Leavai ua fai i lagi le folauga, i le seleni e \$20,000.

3. Le tama ia A'e'au ma le fanau, na foaiina foi le seleni e \$20,000, mo le falesa fou, e manatua ai le tina ia Lagi Leavai ua fai i lagi le folauga.

Ina ua manatu le Ekalesia ua lava le seleni e amata ai le galuega, o lea na amataina ai loa i le aso 13 Ianuari 2014. O le agaiotupu ma le matua o faiva, o le Afioga Seumanutafa Alatina A'e'au ma le Aiga Salemalama mai Falealupo. O le taufalemau o le galuega, o le Susuga lava i le Alii A'oa'o Fesoasoani, Afioga i le faipule ia A'e'au Peniamina Leavai.

E tolu ni vaega na faatinoina ai le galuega:

1. O le fausia o le faavae, e aofia ai galuega tau u'amea, sima, oneone ma maamaa ma piliki ma le faapipiina o piliki, o le totogi ma le tausiga o tufuga mo le vaega lea, sa ofoina ma faatupeina e le tama matua ia A'e'au Peniamina ma le tina ia Lagi Leavai, i lona tau e \$115,949.15.

2. O le anofale e aofia ai faamalama tetele e lua, o moli teuteu, le koluse, le pulelaa ma le Laulau Faamanatuga ma nofoa o le La'o'ai, o Tusi Paia ma Pese, se vaega o le tau o le piano fou, o le laupapa mo pese ma viiga, o faamalama uma o le falesa, se vaega o le tau o airconditioners - sa faatupeina lea i ofo ma foa'i mai tama fanau a Vinifou, ma aiga taitoatasi. O faitotoa uma, sa ofoina ma faatupe e le Autalavou, o le maa folafale na ofoina lea e le Mafutaga a Tina, o le sound system poo mea faaleotele leo; sa ofoina lea e le aufaipese; o le tulaga mo folafolaga, podium, na ofoina lea e le A'oga Aso.

3. O le falealuga, le faapaologa, si'o, faiga o moli, o nofoa o le falesa, vali, carving ma teuteuga, 'ea malulu, se vaega o le piano fou, pa ma le auala, garden, totogi ma le tausiga o tufuga ma nisi mea, na faatupeina i le seleni faitele a le Ekalesia i Vinifou.

O le tau aofa'i o lenei galuega e tusa lea ma le \$384,316,60. Ma ou te fiafia e faailoa pea, le alofa ma le agalelei o le Atua, e ala ia tatou tatalo faifai pea, ma

*faaauau itulau e 4*

---

# O LE LAUGA

## Saunia e Aila Patea FS - EFKS Luatuanuu

1 Samuelu 5: 1 - 5

Mataio 28: 11 - 15

Matua:

Autu: “E malosi le mea moni, ae le moni le mea malosi.”

I le taimi ae le'i iai se tupu i Isaraelu, taimi o Faamasino, o Eli sa vaايا le nuu, o ia foi o le ositaulaga sili, o lana fanau tama o Hofeni ma Fineaso sa fesoasoani ia Eli i le malumalu a le Atua sa tu i Sailo. O le taimi foi lea sa iai le taule'ale'a o Samuelu, o ia o le taulaga ola a si ona tina o Hana mo le Atua ina ua olioli o ia ua tali mai le Alii i ana talotaloga. O le vai taimi foi lea ua le iloa le Alii i Sailo, ona o amioga a le fanau a Eli. Ua oo i le fale o le Atua ua faia ai le toe ma le le migao, ma ua sosolo faaafi ai le amioleaga ma le agasala ia Isaraelu. Ae i le faaiiuga o le mataupu e 3 o le tusi muamua a Samuelu, oloo faapea mai ai le tusitala, “Ua toe iloa le Alii i Sailo ona o Samuelu.” Peitai, ua ui le ma'i ua siliga tali i seu se fofo o le agsala ma le amioleaga, aemaise le fanau a Eli o faitaulaga ma le faamoemoe e suia e se tasi o i laua le toaina i se aso, ma avea ma ositaulagasili, ae ese lava mea sa faasili e Hofeni ma Fineaso. O le tatou tusi faitau mai le 1 Samuelu 5: 1-5, ua ave e Filisitia le atolaau a le Atua. O le atolaau e amoina e faitaulaga e muamua i le autau a Isaraelu, o le faailoga o le iai o le Atua i lona nuu, o ia foi e tau mo i latou. I le taua ma Filisitia na toilalo ai Isaraelu,

fasiotia ai le toatele o latou fitafita, feoti ai ma le fanau a Eli sa amoina le atolaau, a ua sosola ma taapeape isi o Isaraelu. Ina ua maua e Eli le tala faanoanoa, aemaise ua avea le atolaau, fai mai ua pa'u o ia i tua nai le nofoa sa nofo ai, ua gau lona ua, aua e mamafa, ma ua oti ai. A o le atolaau a le Atua na ave nai Epenesa i Aselota, o le aai nofo olo a Filisitia. O le aai foi sa tu ai le fale a Takono, le atua o Filisitia, ae sa tapuai ai foi Suria, Mesopotamia ma Kaletaia i le tupua. Ma o le fale o Takono sa tuu ai le atolaau a le Atua, pei oloo tu maualuga mai le faatusa o Takono ma vaai maualalo i le Atua.

O le faamatalaina o Takono fai mai e tio tagata mai le manava i luga, ae o ona vae o le si'usi'u i'a. O le tuu ai o le atolaau a le Atua i le fale o Takono, o le faailoga lea o le malosi o le tupua, ina ua faiaina ai le nuu o le Atua ma ua fai ma vete le atolaau, o Asetota foi o le nofoaga a Takono, o le aai malosi o le uiga lena o lona igoa Asetota, malosi.

Peitai, e le'i te'ite'i taape le 'autau a Isaraelu ma fasiotia le 'au amioleaga o Hofeni ma Fineaso, o le tau i lea o le agasala. O le isi mea, o le faoa e Filisitia o le atolaau ma ave i Asetota ma tuu i le fale o Takono, o le mea na faia e le Alii, se'i ta'u atu ai ia Filisitia, poo ai le Atua moni, le Atua malosi.

Fai mai e o atu faitaulaga a Takono i le malama o le taeao, oloo fai pusa apa a le latou atua,

ua pa'ufao i luma o le atolaau. Ae i le taeao na sosoo ai, ua le gata i le toe pa'u fao, a ua malepe, ua motu ese le ulu ma lima, ua salalau ua faia'ina mataga le tupua o Takono. Mataga le mea le moni i le oloo moni. Toilalo le mea sa manatu e malosi i le Atua mamana.

O le taape o Takono, e pei o le salalau o le tala le moni, lea na totogi tupe ai ma faatonu e le au ositaulaga sili ma toeaiina o le nuu, fitafita sa leoleoina le tuugamau o Iesu, e tau i tagata. E tusa ai ma le tala a Mataio i le taeao o le toetu, fai mai na to le mafui'e, ua alu ifo le agelu sa ofu i ofu sisina ma fuli'ese le maa o le tuugamau, a o leoleo ua tetemu ma ua liua e pei o se ua oti, o lona uiga, ua le mafai ona gaoioi ua malo, ae na vaai ma iloa mea uma na tutupu. Lea na o atu ma ta'u atu i le au ositaulaga sili mea uma ua faia. A ua liliu e le malosi o le tupe le tala moni. “Ia outou ta'uta'u atu na o mai ona soo i le po ma gaoi ia te ia.” Taumafai e tape ai le Tala Lelei. E le'i mafai e lo latou malosi faata'ita'i o Iutaia, ona taofia, ina ua latou faasala ia Iesu i le faamasinoga na faasatauro ai o ia. Ina ua maliu sa manatu o le malosi o le oti ma le tuugamau e muta ai Peitai, lea ua molimau ai lava fitafita sa leoleoina le tuugamau, e le o iai o ia, ua tuufua. Ona taumafai lea e mimilo i le malosi i le malosi o le tala pepelo, “ua salalau foi lea tala i tagata Iutaia ua oo mai lava i nei ona po.”

*faaauau itulau e sosoo ai*

---

# O LE LAUGA

Le iloa poo le mea lea oloo tau ai pea Isaraelu e oo mai i le taimi nei. Ina ua le talitonu i le tala moni, le Tala Lelei o le toetu o Iesu Keriso, a ua apo le tala sa fatu, ona o le malosi o le tetee ma le lotovale i le Alo o le Atua. Ui i lea, e sili atu ona toatele ua faa-talaleleina ma avea ma Kerisiano, aua e le mafai e le oti ma le tuugamau, ona taofi le mea moni, ua toe tu Iesu Keriso. O le mana ma le malosi o le

Agaga Paia ua salalau ai le mea moni ma ua toatele ua faaolaina ai.

Le Ekalesia e ma le au faitau, o se faamalosi lea mo i tatou, aemaise i lenei masina o lau faiga taulaga aua le Tala Lelei ma le galuega faamisionare ale Ekalesia Aoao. Tatou te le tauo e talai atu ma fai ma misionare, ua lava ma totole lou aao mafola e fai ma ou sao aua le faailoa atu o le mea moni. O le a lea

mea moni? O le Atua malosi ma le Tala Lelei i le Faaolataga ia Iesu Keriso. Aua tatou te faalogologo tala, pe faalogologo tiga, e tupu ai le loto masalo. Ae tatou foai ma le faatuatua, o lo tatou tau e aumai mai le Atua. Fai mai le perofeta o Sakaria, “E le o le fitafita, e le o le malosi, a o lo’u Agaga, ua fetalai mai ai le Atua o ‘au.”

Ia manuia ona o le Alii.  
Amene.

---

## Faapaiaina le Malumalu Fou i Vini-fou

le musumusuga a le Agaga Pa’ia, e ala i le fuafua lelei ma le faatatau lelei, ua mafua ai ona leai se aitalafu o lenei galuega tele.

*mai le itulau 2*

### Faaulufalega:

E le’i faasalalauina se faaulufalega o lenei galuega e pei ona masani ai. Peitai na a’e se tofa ma se manatu o le Ekalesia, ia valaaulia na o i latou sa fesoasoani mai ae faapea foi le Ekalesia Aoao, le Pulega ma le Matagaluega, tatou te sii le tapuaiga o le faapaiaina ma le faaulufaleina o le Punaoleola Fou, ma faafetai ai i le Atua ona ua faataunuaina le faamoemoe, i le Mauga fou o le Atua i totonu o pa o Vinifou nei.

O le taeao o le Aso Faraile 15 Aokuso 2014 i le itula e 10, na tatala ai faitoto’a o le malumalu ina ua uma ona ootiina le lipine e le faletua o le Taitaifono o le Fono Tele a le EFKS, le Faletua

ia Olita Tauti’aga Senara. O le sauniga o le faapaiaina o le malumalu fou na ta’ita’ia e le Susuga i le Faifeau Toeaina o le Pulega Apia Sasa’e, Susuga Siolo Tauati FT. Na faitauina e le failautusi o le Pulega, Susuga Moli Moli FS le Tusi Paia. Tatalo le Failautusi o le Matagaluega a Apia, Susuga Utufua Naseri FS. O le lauga na saunia e le Toeaina Faatonu Susuga Kerisiano Soti FT o le Matagaluega Apia. O le Faamanatuga sa ta’ita’i lava e le faifeau o le Ekalesia i Vinifou, Susuga Fuifui Te’evale FS.

Na saunua faala’ei’au ma faafetai le Taitaifono o le Fono Tele Susuga i le Toeaina Faatonu Tauti’aga Senara FT, ma tauaao le meaalofa tupe e \$20,00 a le Ekalesia Aoao mo le mauga fou o le Atua i Vinifou.

Ou te fialia e faailoa le alofa ma le agalelei o le Atua, e auala eseese mai mo i matou e tusa o lenei faamoeme:

(i) O saoga ma fesoasoani

a matafale taitasi, o matafale faaopoopo ma matafale fesoasoani, na maua ai le seleni e \$28,000, ma le toga e188.

(ii) O le Po Siva na maua ai le \$115,866,90.

(iii) Meaalofa tupe tauaaoina e le paia o le Ekalesia Aoao, Pulega, Ekalesia mai fafo ma le mamalu o le valaaulia, e \$90,400.

(iv) O le aofai o seleni sa tauaaoina e pei ona ta’ua i luga e \$234,266.00

(v) O tupe uma sa faaoga i faaaloaloga, e \$170,179,00.

O nisi o taulaga tupe e ao pea ona faailoa, sa ofoina mai e le paia i Ekalesia:

1. Ekalesia Aoao - \$20,000.
2. Pulega Apia Sasa’e - \$10,000.
3. Ekalesia EFKS i Southwest Brisbane, Ausetalia - \$20,000.
4. Ekalesia EFKS i Manurewa, NZ - \$10,000.
5. Le Tama ma le Tina penisione

*faaauau itulau e sosoo ai*

---

# MATINI LUTERU

1483 - 1546

## O le Auupega o le Toe Fuata'i

Na faaalua foi e Matini i lea taimi, (1) soo se tasi ua papatisoina, o le faifeau i luma o le Atua; (2) e leai se fuafuaga faale-agaga e faatulaga muamua ai se isi tagata i se isi foi tagata; (3) e leai se puluvaga, e pei o se patele, i le va o le Atua ma le tagata; (4) soo se Kerisiano lava e mafai ona ia laugaina le Upu a le Atua.

Sa taumafai ta'ita'i o le atunuu e taofi lenei faasalalauga. Ae te'i ua faaalua e se isi o latou mulimuli ane e faapea, i le amataga na ia manatu ai e matuia mea o tusi mai i lenei faaaliga; ae mulimuli

ane ina ua ia suesue atili i ai, ona ia iloa ai lea e sa'o le mea oloo finau mai ai Matini Luteru. Ona ia tusi ai loa lea i Roma: "O mea oloo tusia mai e Matini Luteru e sa'o. A leai se tagata e faitio i mea sese i le Ekalesia, ae gugu tagata uma ma le pisa, e oo ina alalaga mai maa." (Luka 19:40: "Ou te fai atu ia te outou, a le feganavai i latou nei, e alalaga mai lava o maa.") Na tusi e Matini e faapea:

O le pope, poo le epikopo e faauuina, sele ulu, faauu e fai ma faifeau, faapa'ia, ma ia faatonu ofu e ese mai ofu o i latou e le ni faifeau, ae le

mafai ona ia liliu ai se tagata e avea ma Kerisiano pe ua ia maua le Agaga o le Atua i le faia o ia mea. O le mea moni, o tatou uma lava o patele ua faapa'iaina e ala i le papatisoga e pei ona fai mai le 1 Peteru 2: 9: "A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua ina ia outou ta'uta'u atu ana galuega lelei - o le na valaau ia te outou nai le pouliuli, e oo i lona lava malamalama e matua ofo ai...."

Na osofa'i e Matini le tulafono a le pope lea e fai mai e na o le pope na te faamatalaina ma faamalamalama le Upu. Na te le'i maua se faamaoniga mai tusinga pa'ia e faamaonia ai lea mea, e leai foi se mau e lagolagoina ai le manatu e na o Peteru na tuu iai e Iesu ki o le malo.

I ana tusinga lona lua o faaulutala faapea: E Uiga i le Tafeaga a le Ekalesia i Papelonua, na faitioina ai e Luteru le Ekalesia Katoliko ma lo latou ifo i sauniga e pei o le Faamanatuga ma le Papatisoga, ma fai e pei o ni tupua ia mea. E aoga le faatuatua i sauniga pa'ia ia, ae leai se mana o iai i ia sauniga, o le faatuatua e ala mai ai le mana. Na matua ta'utino e Matini e leai se isi e mafai ona faaolaina e aunoa ma le faatuatua. Peitai e mafai foi ona faaolaina e aunoa ma ia sauniga pa'ia o le Faamanauga ma le Papatisoga.

---

## Faapaiaina le Malumalu Fou i Vini-fou

malolo ia Samuelu ma Tima Tui mai Brisbane le taulaga e \$50,000.

6. Le Toeaina ia Tauaana ma le faletua ia Reeta Mataafa, mai Brisbane, le taulaga e \$11,159.

E tele le lisi o le mamalu o le atunuu, sa alolofa mai, ae ua utiuti le avanoa i le pepa, peitai ua silafia e le Atua lo outou agaga fiafia e foa'i ona o lana galuega ma le Tala Lelei. O le aofa'i o lo outou ma'au i lea aso, e faaopoo i le seleni e pei ona ta'ua i luga, e \$40,200.

Le paia e i le valaaulia, ma le mamalu o le atunuu aemaise paia faale-Ekalesia, o paia faale-malo, o aiga ma paolo, o uo foi a lenei Ekalesia na fesoasoani mai i lenei galuega tele i soo se ala, ua le lava upu o le gagana a

le faifeau ma le Ekalesia i Vinifou nei, e sulaina ai lo outou agalelei ua tele, ma ua silafia lava e le Atua le tagata ma lana foai ma lana taulaga ofoina mo lenei galuega. Tau ia ina na ona matou faapea atu i le Suafa manumalo o lo tatou Alii o Iesu Keriso....Faafetai! Faafetai! Faafetai tele lava. Ua fetalai le Alii, pe a uma ona fai o mea uma na poloaiina atu ia te outou, tou te fai ane, o auauna le aoga i matou nei. 'Aua ne'i ia te'i tatou, 'aua ne'i ia te'i tatou, a ia tuuina atu le viiga ma le faamanu i le Atua. O la le fai Salamo....Ou te faafetai i le Alii i aso uma lava, e le aunoa ona viiga i lo'u gutu. Ia outou faaneene atu i le Alii faatasi ma au. Ma ia tatou vivii faatasi i

---

lona suafa. Ia ia te outou uma lava le manuia o le Atua soifua.

O le faifeau (Fuifui Teevale FS) ma le Ekalesia i Vinifou, Matagaluega Apia, Samoa.

---

# MATINI LUTERU

1483 - 1546

## O le Auupega o le Toe Fuata'i

O se talitonuga matua matuia lava lea i le manatu o Roma. O le Faamanatuga ma le Papatisoga, faapea ma le liua e le patele o le Faamanatuga e avea ma tino moni o Iesu, o ni talitonuga faavae lava ia o le faatuatuga. A o lea ua soli e Matini i lona fai atu lea o le Faamanatuga ma le Papatisoga e mo tagata uma, ae le o ni mea na o patele e aia iai.

Na faitioina foi e Matini le Faamanatuga, ma le mafuaaga e ala ai ona auai tagata. Ua auai i luga o le talitonuga i le totogiina o agasala ma le faaputupuutuina o ni maka poo ni galuega lelei ua faia. O le mea lea, ua liliu ai e tagata le uiga o lenei sauniga mai lona uiga moni o se sauniga e tapua'i ai, i se sauniga e ositaulaga ai.

I lana tusi lona tolu, *On the*

*Freedom of a Christian*, (E Uiga i le Saolotoga o le Kerisiano), oloo talanoaina ai e Matini ni uiga feteena'i o talitonuga o le Ekalesia Katoliko Roma. Ua masani tagata i le faia o galuega lelei ae le o sa'o le mafuaaga e fai ai. E le o faia i luga o lagona o o latou loto. Na matua teena e Matini ia mea ma ia faapea ane, a le faavaeina i luga o le faatuatua galuega lelei ia, o lona uiga o ia galuega lelei o ni mea leaga i luma o le silafaga a le Atua.

**O galuega e foliga mai e matagofie i le vaai atu i fafo, a o le mea moni o ia galuega o ni agasala matuia i luma o le Atua. E le faamasinoina e le Atua le galuega, ae na te faamasino le loto o le tagata oloo fai ai.**

Na tusi Matini e faapea:

O le faatuatua e le se galuega a le tagata. O se mea e faatupuina e le Atua, pe faapea foi, o se malamalama o le ola fou ua maua'a i le loto, ina ua maua le faamaoniga o le agalelei o le Atua ua faaalua i le olioli i le alofa o le Atua ia Keriso.

O tusitusiga a Matini na ia faaaogaina e na te osofa'i ai le faamamafaina o galuega. E moni lava o galuega e foliga matagofie mai i fafo, peitai ona o le mea oloo iai le loto o le tagata, e ono avea ai ia mea o se agasala tele i luma o le Atua.

Fai mai a ia, "Soo se tasi e le tasi ma le Atua, o ia lea e saili ma popole pe faapefea ona ia faamalieina le Atua i ana galuega e tele. A o le tagata ua faavaeina i luga o le faatuatua, e auauna i le Atua e aunoa ma sona faatalitali i se tau.

mai le tusi: God's Generals, tusia e Roberts Liardon, faamatalaina e Afemata T.A. Aiavao

---

# Ua tuu e le Ta'ita'i lana fanau i le Atua

*mai le itulau muamua*

ta'ita'i o le atunuu, poo palemia, na ou auauna iai: Afioga Tupuola Efi, Afioga Vaai Kolone, Afioga Tofilau Eti Alesana, ma le Afioga Tuilaepa Sailele Malielegaoi.

O ni mea taua na ou maua mai ia i latou, e mafai ona ou ta'ua faapea, o nisi ia o mafuaaga na

ala ai ona palotaina i latou e lo tatou atunuu e fai ma o tatou ta'ita'i, poo le avea ma palemia. O ia mea, na ou matauina, e tele lava ina faato'a aliali mai, i taimi ua tofotofoina ai, pe lu'ilu'iina ai, pe fesiligia ai foi le latou tofa, poo le latou ta'ita'iga. O taimi o le tofotofoina i le afi. O le taimi

e saili ai i le tofa mamao ma le utaga loloto. E aumai le tali, e faamalieina ai lava lou loto, ma ofo ai lou tagata, ma fai ma a'oa'oga ia te oe i lou olaga atoa ma e faapea ane: le tioa filifilia e fai ma palemia!

O le a ou le talatalapipi le anoano o mea aoga na ou maua mai ia i latou ua ou ta'ua. Se aso, pe a umi pea le ola ma le malosi, ona ou tusia lea o se tusi o le tele o mea taua na ou maua mai ia i latou i tausaga e 21 na ou galue ai mo latou, ma sa'u matau ia i latou ma lo latou tali

*faaauau itulau e sosoo ai*

---

# Ua tuu e le Ta'ita'i Iana fanau i le Atua

atu i faafitauli sa tula'i mai, a o latou ta'ita'iina le atunuu.

Vagana le mea lenei, ou te manatu e aoga mo le tatou 'au faitau Sulu Samoa. Aemaise lava e aoga mo le va o matua ma fanau. Fanau oloo tatou taumafai e faatauaina mo le atiinae e le gata o le atunuu, ae o le tatou Ekalesia.

O le masina o Oketopa 1988, na malaga ai le alii palemia o lea vai taimi, Afioga Tofilau Eti Alesana, ma le aumalaga e to'aono, mo le fono masani a Malo Afaatasi i Niu Ioka. O lea malaga na aofia ai ma malaga aloa'ia (official visits) i Niu Sila ma Ausetalia.

Na muamua ona malolo le malaga i L.A. (Los Angeles) ma sauni ai mo Malo Afaatasi i Niu Ioka. O L.A. sa nonofo ai nisi o alo o le alii palemia ma le faletua ia Pitoula. O le taimi i le taeao o le la e koloni le alii palemia i le fale koloni e tusa o le 10 maila le mamao, ae ma feiloa'i ma le faletua. Na oo ina talanoa le faletua i lona fia alu e asi lana tama tama ma lona aiga poo solo lelei mea uma, ae musu le "toeaina".

Se taimi mulimuli ane, ae aami mai a'u e le alii palemia mo feau masani o le aso. Na maua loa lo'u avanoa o'u fai iai. Ma aumai ai e Tofilau se tali na pupula ai foi ou mata ona o lona talitonu ma faatuatua i le ta'ita'iga ma le tausiga alofa a le Atua ia i tatou ma a tatou fanau.

"O le a le mea e te musu ai

lua te o ma si loomatua e asi lou atalii ma lona aiga?" o la'u fesili lea.

"O ai na fai atu ai? Ua fai atu ai foi Pitoula ia oe?"

"Ioe, ua popole si loomatua i lana tama....."

"Vaai oe Tunumafono, o le popole vale o le loomatua. O le tama ua matua ua sili mamao i le 21 ona tausaga ae o le la lava e tausi e pei o se tamaitiiti laitiiti. O uiga lava na o tina latou, le tau masepu ane lava o sia mea i tamaiti, oso le popole. O a'u, ou te talitonu ma faatuatua i le Atua ma lana tausiga. Talu ona fananau mai la'u fanau, o o'u tatalo i le Atua ina ia alofa ma tausi latou, ma ta'ita'iina i latou i ala e manuia ai, ma ia matata'u i le Atua. A oo loa ina matutua ma ua atoa lo latou 21 tausaga, ona ou tuuina loa lea o latou e o e ola ma fai o latou aiga, ma tatalo foi latou i le Atua na te faamanuiaina mea uma latou te fai. Ma 'aua le ola faalagolago i isi tagata, ae to'a'aga e faaoga a latou taleni na aumai e le Atua, ma faamoemoe i le Atua, ma ia latou manatua mea ua uma ona ma a'oa'oina ai latou mai le Afioga a le Atua, e manuia ai."

Se aso mulimuli ane ae matou faamavae ma le alii palemia ma le faletua ma le matou 'au malaga i le faletalimalo i Ueligitone, Niu Sila, o le a fo'i mai latou i Samoa ae ou malaga i Lonetona mo se isi fono. Na ma lulu lima ma le faletua ia Pitoula ona ou fai lea iai, "Fai

mai le toeaina e aua e te popole i lau tama i LA."

Na 'ata Pitoula ma fai mai, "Ia, o ia lava lena. Ae ou te popole lava a'u i si a'u tama ma lona aiga. Ma le isi, ou te fia vaai i si a'u tama manu o maua foi si nei avanoa."

Faaalia i nei mea le malosi o le alofa faatina o le faletua mo lana fanau, tusa lava poo ua matutua ma fai o latou aiga, o le fanau lava o le fanau.

Ae faaaliga ai foi iinei talitonuga malolosi o Tofilau, ua uma ona a'oa'oina lana fanau, ua uma ona tuu i le Atua. Faatuatua la'ia i le Atua ma lana tausiga ma lana ta'ita'iga.

I nei aso, a ou vaavaai atu i nisi o alo o Tofilau ma Pitoula, o se'ei mai i nisi o tofi o le atunuu, ona ou manatua lea o le faaaliga na ou maua mai lo latou tama, i Los Angeles, Amerika, i le tausaga e 1988.

Mo tupulaga talavou o le Ekalesia latou te le silafia, o matua o le Afioga Tofilau Eti Alesana, o Alesana ma Vaoita. O Alesana o le uluai faifeau Samoa lea na tofia e avea ma uluai sui pule o le Kolisi Faafaifeau i Malua, i aso o pulea e misionare mai Lonetona le a'oga, ma oloo igoa foi le tatou Ekalesia o le LMS - (Lonetona Misionare Sosaiete). O Vaoita, e tino 'ese toe umi, ma o se tina na matua iloga foi lona tulai mai i le Mafutaga a Tina o le Ekalesia i ona aso. Sa ta'ita'ifono foi le Afioga Tofilau Eti Alesana i le EFKS i nisi tausaga ua mavae. Na avea foi se tasi o i latou na tupuga mai ia Alesana ma Vaoita, ma Kovana o le Malo o Amerika Samoa, i se vai taimi e le'i

*faaauau itulau e 8*



---

O le Mafuaaga o le pese:  
**To God be the Glory**

*mai le itulau muamua*  
lava lea o soo se Kerisiano, ae ia faapea foi ona tatou naunauta'i iai pe a tatou tauaofia i soo se mea. E pei ona fai mai le Eperu 2: 12: "...Ou te ta'u atu lou suafa i o'u uso, ou te pese atu viiga ia te oe i totonu o le faapotopotoga."

E tatau lava ona tatou mataala ma lagona le ta'ita'iga a le Atua aua oloo ia auai i soo se mea tatou te iai, ma e tatau ai foi ona tatou faaali lo tatou mautinoa,

ooloo ia faamanuiaina mea uma oloo tatou fai. Pei lava ona fai mai upu o le pese leni: "...great things He hath taught us and the great things he hath done..." (o mea tetele ua ia a'oa'oina ai tatou, ma mea tetele ua ia faia..) A tatou le lagona ma le agaga faafetai ia mea, ona tatou misia lea o le sini o le tatou misiona, ae faataua tatou ma ni mea ua tatou fai.

Na faato'a alia'e leni pese i se tusi pese na tuu faatasi ai pese

mo A'oga Aso Sa ua ta'ua - *Brightest and Best*, na tuu faatasia e William Doane ma Robert Lowry i le tausaga e 1875. A o le tausaga e 1952 na alu ai se malaga faa-evagelia a Billy Graham i Egelani, na matua faaaogaina ai e Billy Graham i ana sauniga leni pese. Ma e na matua talia lelei e tagata leni pese ma oo ina matua lauiloa ai. Na faapea foi ona tali leleia leni pese ina ua latou foi mai i Amerika, ma faaauau ona latou faaaogaina ia latou sauniga faa-evagelia, ma atili lauiloa ai lava. O le pese na tusia e Fanny J. Crosby.

## *To God be the Glory*

To God be the glory-great things He hath done! So loved He the world that He gave us His Son,  
Who yielded His life an atonement for sin, and opened the Lifegate that all may go in.

Oh perfect redemption, the purchase of blood! To ev'ry believer the promise of God,  
the vilest offender who truly believes, that moment from Jesus a pardon receives.

Great things He hath taught us, great things He hath done, and great our rejoicing thru Jesus the Son;  
but purer and higher and greater will be, our wonder, our transport, when Jesus we see.

### *Chorus:*

Praise the Lord, Praise the Lord, let the earth hear His voice. Praise the Lord, Praise the Lord, let  
the people rejoice! Oh come to the Father thru Jesus the Son, and give Him the glory great  
things He hath done.

---

*mai le itulau e 7*

## **Ua tuu e le Ta'ita'i lana fanau i le Atua**

mamao tele atu. O le isi tamalii o le aiga, o Fofu Sunia, (Joseph Iiga i aso o matou a'o'oga i le Kolisi o Samoa,) e tele tausaga o fai ma sui o Amerika Samoa i le Congress a le Unaiete Setete o Amerika i Uosigitone.

O le aiga o le 'Au Alesana, o se aiga e tupuga mai i faifeau LMS.

Afemata T. Apelu Aiavao

## **O Fetagisiga i luga o Tagata Oti**

O tu ma aganuu a tagata i atunuu i sasae, (Middle East), e fetagisi i luga o tagata oti. E matua leo tetele lava fetagisiga. Ina ua oti Apisaloma, na matua tagi lava lona tama o Tavita. E ui lava e le'i iloa atu o ia i totonu o lona maota, ae lagona lelei atu e tagata lona tagi aueue: "Apisaloma e! Apisaloma e

lo'u atalii; lo'u atalii; lo'u atalii!"

Ina ua tuuina ifo Iakopo i le tuugamau, na matua alalaga leo tetele fetagisiga a tagata o le nuu. Oloo ta'ua foi le tagitu'i o Iefata ina ua vaai atu o aga'i mai lona afafine ua uma ona ia ofoina atu e fai taulaga i le  
*faaauau itulau e sosoo ai*



## *O le Alofa Moni*

O Mose Menetelesone (Moses Mendelssohn), o le tama o le tama o le fatupese Siamani ta'uta'ua ma le lauiloa i le lalolagi. E le se tagata aulelei. E le gata ina puupuu, ae o ia foi o se tuapi'o.

O se isi aso na alu ai o ia i le faleoloa o se tagata i Hamupeka, (Hamburg). O le tamaloa lea e iai lona afafine e matua aulelei lava. E miomio solo taulele'a ma tafafao i le mea e iai le faleoloa o Mose, ona o le fia vaai ma talanoa i le afafine o le faioloa. O le igoa o le teine, o Faimasei. Na vaai loa iai Mose i le teine valea loa iai. Ua mana'o la te uo. A o le faalavelave, e mimigi tino o Faimasei ma fefe pe a vaai atu i le tuapi'o o Mose.

Ina ua oo i le taimi o le a fo'i

ai Mose i lona aiga, ona tau faaputupu lea o sona loto tele, ae alu e talanoa ia Faimasei. Ua savalivali atu nei i le faasitepu aga'i i le potu o le teine. Se'i toe talanoa tasi lava iai pe sui ai le mafaufau o le teine. I le manatu o Mose, o le lalelei o Faimasei o se mea na faia mai le lagi, e le maua i le lalolagi. Ae faanoanoa tele Mose, ona e le fia vaai mai Faimasei ia ia. E 'alo lana vaai ia ia ona o lona tua e pi'o. Peitai na totogo a'e i ona tino lona mana'o ia Faimasei, ona taumafai atu ai loa lea faapea i le teine, "E te talitonu o faaipoipoga e faia mai le lagi?"

Na tali Faimasei ma tilotilo lava i lalo i le fola o le fale, "Ioe! o le tali lea a Faimasei. "Ae te talitonu iai?"

"Ioe, ou te talitonu iai," o le tali lea a Mose. "Vaai oe, i luga i le lagi, i taimi uma lava e fanau mai ai se pepe o se tama, e ta'u mai ai e le Alii poo ai le teine o le a la nonofo pe a matua. Ina ua ou fanau, na faailoa mai ai e le Alii le teine o le a ma nonofo. Na ia faaali mai foi, o le teine o le a ma nonofo e tuapi'o."

O le taimi lena na ou valaau atu ai i le Alii, "Le Alii e, e matua leaga tele lena mea. Faamolemole, le Alii e, faatuapi'o a'u ae fa'atuasa'o pea le teine."

O le taimi lea na ea a'e ai Faimasei i luga, vaavaai toto'a atu ia Mose, 'a'apa atu lona lima, ma toso mai ma fusi. Ma aluga atu lona ulu i lona fatafata. Ma avea o ia ma ava faamaoni ia Mose i lona olaga atoa.

tusia e Barry ma Joye Visell,  
faamatalaina e  
Afemata T. Apelu Aiavao

---

## **O Fetagisiga i luga o Tagata Oti**

tagata e muamua lava vaai iai pe a fo'i mai ma le manumalo i le taua ma Sa Amoni. Ua iloa atu o ia ona saei lea e ia ona ofu, ua fai atu, Aue! lo'u afafine e, ua e matua faatigaina au.....ua ou tautala atu i le Alii, ou te le mafai ona faafo'i mai la'u upu".

Tai tutusa lava ma fetagisiga a tagata Aikupito pe a oti se isi o latou: A oti le ulu poo le matai o le aiga, o ana ava uma lava, ma ana fanau, o auauna, e masani ona fetagisiga faapea, "Oi le matai e!" "Oi la'u kamela e!" "La'u liona e!" "Le kamela e o

le fale!" "Oi lo'u mamalu e!" "Oi le puna e o mea lelei ma manuia uma!" "Lo'u tama e!" "Lo'u faanoanoa e!"

E faapea foi tu a tagata Hinitu o Initia. Pei o le tagi a le tamaloa pe a oti lana ava: "Ua leiloa lo'u 'i'oimata! La'u suani! La'u koke! La'u 'oti o le vao! O ona lanu e pei o le auro! O ona fuaitino e pei o le suani! O lona puimana e pei o le uila 'emo! O ona nifo e pei o penina! O ona laumata e pei o le lolo'u o le a-u! O lona lalelei e pei o le fugalau matala! Ioe,

ua alu le tina o la'u fanau! Leai se isi na te faatalia a'u pe a ou fo'i mai i le fale i le afi! Oi lo'u to'alua e! faalogo mai i le leo o lau tane!

E tagi foi le tama i luga o lona atalii ua oti ma faapea ane: "Lo'u atalii e! Lo'u atalii e! Ua e sola moni lava! Fai mai, ua e sola! Ae faapefea o lea ua ou toeaina? La'u liona! La'u a-u! Lo'u toto, ma lo'u tino, lo'u ola ma le e tolu iai o'u mata! Ua leiloa! Ua leiloa! Ua goto i le vasa!

Ae iai foi tagata e le faia iai ni fetagisiga: Ieremia 22:18: "O le mea lea oloo faapea ona  
*faaauau itulau e sosoo ai*

## O le Meaalofa mai le Uso

*mai le itulau muamua*

ulufafo mai Paulo mai lona ofisa, e vaai mai, o taamilomilo atu se tamaitiiti i lana taavale fou lea na faameaalofa atu mo ia e lona uso.

“Oi sole! o lau taavale lea? O le fesili lea a le tamaitiiti ma milimili le tino ‘i’ila o le taavale.

Na ioe atu iai Paulo ma fai atu, “Toe! o la’u meaalofa mai lo’u uso mo le Kerisimasi.”

“Oi sole! Oi sole! Le Kerisimasi taeao? Na fai meaalofa atu lou uso ia oe i le taavale? Le taavale lea? O lona uiga e leai sau tupe na alu ai? E te le’i faataua?” Na tatala e Paulo le faitoto’a ma tuu i totonu o le taavale lana ‘ato, ma faalogo atu o faapea le tamaitiiti, “Ma’imau pe ana.....” ona motu lea o le faamatalaga a le tamaitiiti. Na mate’ia e Paulo le mea oloo i le mafaufau o le tamaitiiti. *‘Ma’imau pe ana iai sona uso faapea’* Ae te’i Paulo i le upu a

le tamaitiiti na fai ane, “Ma’imau pe ana ou pei o lou uso!” O lona uiga, e le o mana’o le tamaitiiti na te maua se meaalofa faapea, a ia mafai ona ia foa’i atu se meaalofa faapea.

Ona fai atu lea o Paulo, “E te fia ti’eti’e i la’u taavale?”

“Oi, ua lelei. Manaia!”

Na ‘ave’ave Paulo ma le tamaitiiti mo sina taimi, ona faapea lea o le tamaitiiti, “Faamolemole, e mafai ona e ui atu i luma o lo matou fale?”

Na ‘ata’ata Paulo ma mafaufau, e mana’o le faala’itiiti lea e vaavaai mai lona aiga ma tuaoi o ti’eti’e atu i se taavale fou manaia ma le ‘i’ila. Peitai e le’i mate’ia e Paulo le mea moni oi le mafaufau o le tamaitiiti. “Faamolemole, tu lau taavale e faafeagai ma sitepu la e lua e tuu mai.”

Na tu le taavale e pei ona mana’o ai le tamaitiiti. Ona tamo’e lea i luga i le faasitepu. E le’i umi ae vaai atu Paulo, ua

aliali mai le tamaitiiti i le faitoto’a, o sii mai lona uso e pipili. Na tuu i lalo le uso pipili i le faasitepu, ona nofo ifo lea o le tamaitiiti i ona tafatafa, ma tusi ona lima i le taavale ma fai atu i lona uso, “A lale. Pei a ona ou fai atu. O lana meaalofa na maua fua mai lona uso mo le Kerisimasi, ma e le’i alu ai sana tupe. Ma e iai se aso, pe a maua ni a’u tupe, ona ou faataua lea o se taavale faapela le fou ma le manaia ma oe, ona e fealua’i ai lea, ma e matamata i le tele o meaalofa o faaali i faamalama tioata o faleoloa, mea ia ou te faamatalaina soo ia oe.”

Na savali atu Paulo ma sii mai le uso pipili ma faanofo i le nofoa i tua, ae alu atu le tamaitiiti, poo lona uso matua, ua nofo atu i ona tafatafa.

Ona latou ti’eti’e ai lea ma feuia’i le latou taavale ma matamata i le tele o mea mananaia o faaaliga mo le Kerisimasi.

O le Kerisimasi lea na atili malamalama ai Paulo i le fetalaiga a Iesu: “E sili le manuia o le na te foa’i, i le na te talia.”

tusia e Dan Clark,

faamatalaina e

Afemata T. Apelu Aiavao

*mai le itulau e 9*

### O Fetagisiga i luga o Tagata Oti

fetalai mai ai le Alii, i mea a oo ia Ioakima le atalii o Iosia, le tupu o Iuta. Latou te le taufaitagitu’i ia te ia, e faapea, Aue! lo’u uso e. Aue! le tuafafine e. Latou te le taufaitagitu’i ia te ia e faapea, Aue! le alii e. Aue! le mamalu e. E tanumia o ia e pei ona tanua

o le asini. E tosina ma tia’iina i tua o le faitotoa o Ieruselema.

Ae faapefea tatou i Samoa? O le a ni a tatou tagi e fai i taimi o maliu?

“Papa ua e sola ae leai se isi ou te matanana iai!” “Mama ua e alu e le’i lava la’u tausii ia oe.” “Mama o si a’u fanau lea ua o mai a o lea ua e alu! E le’i faatofa si a’u fanau ia oe. Se Mama e le’i faatofa la’u fanau ia oe a ua e alu.” “Mama na e fai mai matou te o i Niu Sila e

su’e ni tupe ma tatou a o lea ua e sola ae leai se isi e lafo mai iai tupe. Mama tua e leaga ua le aoga nei tupe ua matou maua!” “Papa faamagalalo a’u i lo’u le usitai ia oe.”

Ae ese ai lava le tagitu’i a le isi mafine ma tatu’i le pusa o lona tina: “Oi si o’u tina e! Se Mama sau e sasa a’u. Mama sau e toe sasa au.”

A o tagi faanoanoa uma lava. Poo le a lava le ituaiga tagi, e mafua lava ona o le faanoanoa.

*Information Please!*  
**E toe pepese foi  
manulele i isi lalolagi**

*mai le itulau muamua*

iai se telefoni. O le taimi lea o o'u laitiiti lava. O le mea e te 'u'uina ma e tautala iai, e tautau mai i se tama'i pusa e iai ma le 'auvili e te vilina ai le telefoni pe afai e fai sau telefoni i se isi tagata. Ou te manatua lava le numera o le matou telefoni - 105. A fai nei se telefoni a lo'u tina ou te alu atu ma ou tutu i ona tafatafa ma ou faitatala i ana tala e fai. O le isi aso na ia siina ai a'u i luga ina ia mafai ai ona ou talanoa i lo'u tama le la e telefoni mai i lana galuega. Uiga ese le sau o le leo i uaea telefoni!

Mulimuli ane ae ou iloa e iai se teine poto ma le loto fesoasoani e nofo i totonu o le telefoni, o lona igoa o "Information" - ma e leai se mea na te le iloa. E fesili iai lo'u tina i le numera o le telefoni a lea tagata ma lea tagata, e na te iloa uma; pe fesili foi iai lo'u tina poo le a le taimi, e vave lava ona ta'u mai e "Information" le taimi sa'o.

Faato'a ma feiloa'i lava i le telefoni ma "Information" i le aso na alu ai lo'u tina i le fale o le matou tuaoi i sana fe'au. O le tu'itu'iina o la'u taavale atigi'apa i le samala na lavea ai lo'u limamatua. Na matua tiga lava, ae le aoga le tagi aua e leai

se isi oi lo matou fale e tali mai vagana a'u. Na ou savali solo i totonu o lo matou fale ma ou tagi ma mimiti lo'u lima e tau faate'a ai le tiga. Ae ou iloa atu ai le telefoni! Na vave lava ona ou alu atu ua toso mai le nofoa ua faatu i tafatafa o le telefoni, ma ou oso o'u tu ai i luga. Na ou tago atu ua se'i mai le telefoni ma tuu i lo'u taliga, ma ou tautala iai - "Information please!"

Na vave lava ona ou faalogo atu ua tautala mai le teine i lona leo manino lelei, "Information".

Na ou tagi masusu ma ou fai iai, "Ua tu'ia lo'u lima i le samala."

"O iai iina lou tina?" o le fesili lea a le teine.

"Leai, na o a'u le fale."

"O tafetotoi lou lima?"

"Leai; o le tu'itu'iga o la'u taavale atigi'apa na lavea ai; matua tiga lava...."

"Alu i le tou pusa'aisa, ta'eta'e mai sina fasi 'aisa ma tuu i le mea na lavea. E vave lava ona te'a ai le tiga. Ma 'aua e te tagi, e toe lelei lou lima."

Na amata ai i le aso lea ona ou telefoni ia "Information please" i soo se mea lava ou te mana'o iai - i le faiga o la'u numera; poo le saienisi; poo fea foi e iai lea setete ma lea setete o Amerika; poo manuki foi ma

fua o laau e aai ai. E leai se mea e le iloa e "Information".

Pei o le aso na pe ai le matou manulele sa tausii. Sa fai mai i le telefoni ana tala faa-tagata matua e faanana ai a'u ma tau faate'a ai lo'u faanoanoa. Na ou fesili iai, aisea e pepese malie ai manulele, ma latou faafiafiaina tagata, ae a mamate, ua maumau ai o latou tino mananaia ma a latou pese malie.

Na te'a ni nai sekone ona tali mai ai lea o le teine, "Paulo, ia e manatua e toe pepese foi manulele i isi lalolagi."

O le isi foi aso na ou tago ai i le telefoni ma ou fai iai, "O le a le sipelaga o le *limamatua*?"

"Le tama'i lima lapo'a puupuu i lou alofilima?"

O le taimi lea na oso mai ai lo'u tei laitiiti ma faate'i au e pei o lana masani. Na ou pa'u i lalo ma le telefoni ma motu ai le uaea. Ou te toe tago atu i le telefoni ua pe.

E le'i umi ae tu'itu'i mai le faitotoa e se tamaloa o 'u'u mai lana pusa faigaluega. Fai mai, "Sa ou faia le telefoni a le aiga lea tou te sosoo ae te'i ua vili mai le talitelefono fai mai ou te sau i le tou fale pe iai se mea ua leaga o le tou telefoni na te'i ai ua motu lana talanoaga sa fai. O le a le mea na tupu?"

Na ou faamatalaina iai le faate'iga o a'u e si o'u tei, na ou te'i ai, o'u pa'u ai ma le telefoni, motu. E le'i umi ona fai e le tamaloa le telefoni ae uma, tuu ane i lona taliga ma talanoa i ai: "Talofa! o Pita. Lea ua lelei le 105. O le faate'iga o le tama e si ona tei laitiiti na mafua ai ona pa'u i lalo ma motu ai."

Ina ua iva ou tausaga, ona

*faaauau itulau e sosoo ai*

---

*A Page for Youth*  
**ITULAU MO TUPULAGA TALAVOU**

*Information Please!*

# E toe pepese foi manulele i isi lalolagi

matou sii ai lea i se isi itu o Amerika matou nonofo ai. Na ou misia ai lava le teine i totonu o le telefoni. Ua faasolosolo ina ou matua, poo ua 16 o'u tausaga, ae le galo lava ia te a'u le leo o "Information". Soo se mea lava ou te fia maua pe ou te fia iloa, e maua mai lava ia "Information" le tali. O lana talatalanoa mai i lona leo malu, ou te fiafia lava iai. Na ou mafaufau foi, ai se aulelei o le teine fua ina manaia lona leo.

Ua ou a'oga nei i le kolisi, ma oo ina ou malaga ai i le vaalele i le aai e iai le iunivesite o le a ou aoga ai. Pe itula na ou iai i le malae vaalele. Na ou viliina lo'u uso ma ou talanoa iai. Ae te'i ua oso mai i lo'u mafaufau, la'u uo i le pusa telefoni - o "Information!"

Na ou tago atu i le telefoni ma vili i le aai sa ou nofo ai e iai la'u uo i le pusa telefoni e igoa ia "Information!"

O le manino ia o lana tali mai i maila e fia afe: "Information!"

Na ou fesili lea iai, "Faamolemole lava pe o le a le sipelaga o le upu 'limamatua?'"

Ni nai sekone e leai se tali, ona ou faalogo atu ai lea i lona leo. "Ah! Fea ua e iai? Ai ua pe le manu'a o lou lima i le samala na tu'itu'i ai lau taavale atigi'apa!?"

Na ou 'ata 'e'e, "Oi talofa e! O lena lava e te faigaluega iina? Ailoga e te iloa e le mafai ona galo oe ia te au, e ui lava ou te le'i vaai ia oe. Lea ua ou matua ma ua ou a'oga i le iunivesite, ae le mafai ona galo oe ia au."

"E faapena foi a'u. E le mafai ona galo oe ia a'u. E leai sa'u tama poo sa'u fanau, ae pei lava e iai sa'u tama ona o oe, ma lau telefoni mai ina ua tu'ia lou lima i le kamutaina o lau taavale atigi'apa. Na ou matua faanoanoa lava ina ua ou le toe faalogo atu i lou leo i le telefoni. Na ou faapea poo le a le mea ua tupu ia oe."

Na ou fai iai pe mafai ona ou telefoni atu pe a tuua le a'oga ma ou alu atu i le mea e iai oloo nofo ai lo'u uso laititi.

"Telefoni atu! Soo se taimi lava! Telefoni atu! Fesili mo Sally."

"Oi, o Sally la lou igoa mo'i!"

Ua lelei. Ta toe talanoa i se isi aso. Ia tofa Sally."

Ua te'a masina e tolu ae ou toe taunuu i le malae vaalele o le nuu sa ou iai muamua. Na ou viliina le telefoni, ae paga lea! e ese le leo na tali mai. Na ou fesili pe mafai ona ou talanoa ia Sally. "O oe o sana uo?" Na fesili mai ai le leo e ese ou te le masani ai.

"Toe! mai aso ua te'a."

"Ia, talofa e, o nai tausaga ia ua te'a, sa galue ai Sally faavai-taimi ona ua fai ma ma'i. Ae na maliu tusa ua lima nei vaiaso."

Pei e patatu se maa i lo'u fatu!

"Faatali mai lava." o le toe fai mai lea a le talitelefoni. "Na e fai mai fo'i o lou igoa o Vilata?"

"Toe!"

"Ia, e iai le tusi na tusi e Sally mo oe a o le'i maliu. E le umi."

"Se'i faitau mai faamolemole."

"O upu nei na ia tusia: A telefoni mai se tama e igoa ia Paulo Vilata, fai iai: 'E toe pepese foi manulele i isi lalolagi'. Na te manatua le mea sa ma talanoa ai. Ma fai iai, e le mafai ona galo ia ia au."

tusia e Paul Villiard,

lomia i le Reader's Digest,  
faamatalaina e

Afemata T. Apelu Aiavao

---

## Famous Words from Lenin

I have made a great mistake. Our main purpose was to give freedom to a multitude of oppressed people. But our method of action has created worse evils and horrible massacres. You know that my deadly nightmare is to feel that I am lost in this ocean of blood, coming from innumerable victims. It is too late to turn back now, but in order to save our country, Russia, we should have had ten men like Francis of Assisi. With 10 such men we would have saved Russia.

(Alleged last words of V. I. Lenin)

---

**ITULAU MO TUPULAGA TALAVOU**

**“E! ta fia maua ‘apa’au  
e pei o le lupe....”**

O IEROME, o se Kerisiano na fanau mai i le vai taimi i le va o le 300 ma le 400 tausaga talu ona fanau mai le Mesia. O le vai taimi ua tau maona atu sauaga mata’utia sa feagai ma le ‘Au Kerisiano i uluai tausaga o le Tala Lelei ia Keriso.

O Ierome o se tagata pisi tele i le a’oa’oina atu o le Tusi Paia. Sa malaga solo foi mai lea nuu i lea nuu ma a’oa’o atu ai. A o le mea sa aupito taua ia te ia, o le fia mapu lea i se mea tuufua na te mafai ai ona faitau le Tusi Paia ma ia su’esu’eina.

E ui ua te’a atu sauaga sa feagai ma le Au Kerisiano,

peitai oloo tevateva pea le ola o le Ekalesia i lea vai taimi, talu ona te’a le 200 o tausaga o sauaina i latou. O lea ua tele ina pulea e Kerisiano nuu, peitai e anoanoa’i mataupu ma faafitauli e tataua ona latou fo’ia, mataupu faale-agaga, ma mataupu tau i le ola o tagata i aso fai soo.

Mo se vai taimi sa galue ai o ia i Roma o se fesoasoani ia Pope Tamasesa, o le vai taimi lea na ia amata ai se galuega na logologoa ai o ia mulimuli ane. O le faaliliuina lea o le Tusi Paia i le gagana Latina. Peitai ina ua maliu le pope, na faanoanoa

lava Ierome ina ua le filifilia o ia e avea ma pope e sui ia Tamasesa. E le gata i lea, ua amata ona faitioina o ia e tagata. O fea nei a sola iai o ia e maua ai sona filemu?

Ua alu o ia i Peteleema ma nofo ai ma galue, mo tausaga e 30 o lona soifua o totoe, ma faaaauai ai ana tusitusiga. Ma, e foliga mai ua ia maua le lafitaga sa ia mana’omia. O ina na ia faamae’a ai lana faaliliuga o le Tusi Paia, lea ua lauiloa o le Vulgate. E tele foi nisi tusitusiga na ia faia a o nofo ai o ia i Peteleema.

E le o se mea e ofo ai la pe a silafia e tagata, o le Salamo e 55 o se tasi lea o tusi e aupito sili ona fiafia o ia iai, aemaise lava fuaiupu e 6 ma le 7: “E! ta fia maua ‘apa’au e pei o le lupe, ou te lele ese ai lava, i le ou nofo mau ai. Faauta, ou te sola mamao atu lava; i le ou nofo ai i le vao.”

---

**UA ESE LAVA TUPULAGA  
O NEI ASO**

Ua vave lava ona matutua tupulaga o nei aso. O le mea lea e mana’omia tele ai le tatou fesoasoani.

Ou te fesiligia lava e a’u a’u ia pe aisea na ou le lelei ai ma avea a’u ma tagata e faaa’oa’o mai iai tupulaga talavou o nei vai taimi. Ia, ona pau lava o a’u ia, ou te nofonofo lava a’u ou te le fia aafia ai i uiga o tupulaga e tula’i mai. E le o a’u foi o se foma’i o le mafaufau ou te mafai ai ona fuafua ni togafiti e fai e suia ai o latou uiga, mai le leaga i le lelei. O a’u o le inisinia, ma e lelei la’u galuega

e faaaoga ai lo’u poto faa-inisinia. O le mea lea e le mafai ona ou inisiniaina uiga pa’a’a o tupulaga.

Ae oso soo mai lava le manatu lea ia te a’u - o le fia fesoasoani i tupulaga i le faaleleia o o latou uiga, fo’ia o o latou faafitauli, ma tali atu i o latou lagona vevesi.

Ona ou vili ai loa lea i le pulea’oga i le nuu ou te iai, ma faaali iai le mea o mamafa i lo’u mafaufau - o le fia suia lea o uiga o tupulaga ina ia lelei ma tausaaafia.

Na matua fiafia le pulea’oga i

le mea na ou talanoa ai, ma fai mai ou te alu atu. Ua tele nai tausaga ou te le’i toe tu i totonu o se a’oga maua. O le mea lea na ou popole ai lava ma ou faapea ifo, “Mata ou te mafai ona ou malamalama i uiga o tupulaga, ma ou fesoasoani iai e fo’ia, ina ia tula’i mai ni suiga e lelei mo lo latou lumana’i.

Ua faasino mai le potu numera 103 ou te alu iai. Na ou manavanava tetele i totonu, toe manava i fafo, ona ou tatalaina loa lea o le faitotoa o le 103. O le matua pisa ia o tama ma teine a’oga e 32 oloo iai. Ae na pei o le pe o se afi o se taavale le te’a o le pisa ae autilo uma mai ia a’u.

“Hai Maloni!” Ua fiafia faaaauai itulau e sosooai

---

# UA ESE LAVA TUPULAGA O NEI ASO

tamaiti a’oga ma faasaga lelei mai. Na matou talanoa i taaloga, le taua o le a’oga, ma mana’oga o le tama ma le teine a’oga ia pe o fea e aga’i iai pe a i’u ma le a’oga. Ma ina ua ta le logo ua mae’a le a’oga, na ou faanoanoa ua vave ona tuua. Na ou matua fiala lava i le vasega.

Ae to’atasi lava le tama e le ano mai. O Paulo. Ma e le mafai ona toe galo ia a’u Paulo. E tutu’a ona tino, e lapo’a masomasoa; faato’a amata i le a’oga lea; fai mai lipoti ua tele nofoaga mo tupulaga faigata ua faasalaina Paulo ma tuu ai. Ma le isi, e matua fefefe faia’oga ia Paulo. Ma e sala ina fefefe! Lua tausaga ua te’a na falepuipui ai ina ua ia tuiina le fatafata o lona faia’oga o le Igilisi. O le ala lea e tuu ai lava Paulo ia e fai le mea e loto iai. Pe tasi le itula talu ona amata le a’oga, ae faato’a savalivali atu. E leai ni mea a’oga e avatua. Ou te talitonu e tasi lava le mea e alu atu ai Paulo i le a’oga o le autilo lea i teine.

A ou taumafai atu e faatalanoa, ae na o le faatau pupula matamata ita mai ia a’u. O Paulo e pei lava o se pomu o faatalitali e pa!

Ua oo i le taimi e faasolosolo ai tama ma teine e tutu i luga e talanoa mai i mea latou te moomoo iai. Na tu Julie ma fai mai o ia e fia foma’i. O le taimi lea na ‘ata ‘e’e mai ai se tagata mai le pito i tua o le potu. O Paulo! “Ei! E te fia foma’i? Ia onosa’i; e le taitai ona e pasi i le faafoma’i.”

O le a nei la’u mea e tatau ona

fai? Ua leai se pisa i le potu.

“Paulo, e le sa’o lona mea ua e fai mai ai. O ai oe e te fesiligia ai mana’o o le isi tagata?” O la’u tala lea ua fai ia Paulo.

Fai mai le tali a Paulo, “E te oso mai ia a’u? E te le faaaloalo mai ia a’u? E te iloa o ai a’u? O a’u na amataina le fai kegi leaga iinei. Aua la e te fia tofotofa mai. E oo ina tupu ai se faalavelave ia oe!”

Na ato ese e Paulo lona nofoa ma tu i luga savali i le faitoto’a, tatala, ulufafo ae ou valaau atu iai, “Leai Paulo, e leai sau aia i le isi tamaitiiti a’oga. ‘A ‘e musu foi e te a’oga iinei o lau lava filifiliga lea. I totonu o le potu leni, o oe o le isi tama a’oga, e felagolagoma’i ma galulue faatasi. Ma le isi Paulo, e matua tele mea lelei oi ia te oe. E tele mea e mafai ona e fesoasoani mai ai i le tatou vasega. Ou te fiala ma alofa ia oe. Ou te fiala ma ou alofa i tama ma teine uma i le tatou vasega, e iai ma oe. O le mafuaaga lona o lo’u sau, o lo’u fia fesoasoani.”

Na pupula ita mai Paulo ia a’u, tatala le faitoto’a, alu i fafo ma ato mai le faitotoa. Leai ma se isi e pisa o le vasega. Na ou tago atu ua ao mai a’u tusi ma ou amata savali loa i la’u taavale. Ae ou faalogo atu o valaau mai se isi.

“Faamolemole lava Simiti, e te manatua au tala ia na fai mai ia a’u?”

“Ou te manatua, Paulo.”

“E moni e te fiala ma e alofa ia a’u, ma e mana’o mo’i ou te auai i mea e fai a le vasega? E

te le ita ma e inoino ia a’u?”

“Paulo, o le mea tonu lava lona na ala ai ona ou sau i lau tou vasega. Ou te fesoasoani ia outou uma. Ma ou ta’ita’iina outou i ala e mafai ai ona outou ausia o outou moomooga i le lumana’i.”

“O le mea moni lava lau Susuga Simiti, o oe le tagata muamua ua fai mai e alofa ia a’u ma fia fesoasoani ia a’u. O oe lava le tagata muamua ua fai mai faapea. Faafetai tele lava i lou le fefe i ou uiga na faaalai. O le a ou faato’ese ia Julie i luma o le tatou vasega pe a oo taeao.”

Pei e le talitonu o’u taliga i le faamatalaga a Paulo. Ua savali ese atu, ae na o lo’u tu ma mafaufau, ma maligi o’u loimata. Ua tuia lo’i fatu i upu a le tama, ma ou mafaufau ai, o le a tuuina atu lo’u ola ou te fesoasoani ai i tupulaga talavou.

tusia e Marlon Smith

---

## Fai mai le Faiaoga o Komisi Faraimo

O le pulea’oga i aso o matou aoga i le a’oga a Maluafou, o Komisi Faraimo mai Saleimoa. O lana fautuaga e fai soo ia matou tama a’oga (na o tama le a’oga i aso na), to’a’aga e faatumu muamua le atigipoo i le potu, ma fai lelei lau amio, ona e le popole lea e saili se teine e fai ma ou toalua. Saili muamua le potu, faato’a manatu ai i se toalua.

O aso na, o nisi o tama a’oga oloo faatali mai le ava ma le fanau i le fale, ae o mai e a’o’oga. O aso o le matutua o tama aoga. Sa ou aupito laititi ai lava i le matou vasega, a o faiaoga ai i le Igilisi le misionare o Misi Uaita na ia faavaeina le aoga.

Afemata T. Apelu Aiavao

---

# Lauga EFKS TV Aso Sa

17 Aokuso 2014

Saunia e Epati Setefano FS

Ofisa Tutotonu EFKS - Tamaligi, Apia

Feagaiga Tuai: Kenese 2: 8-17  
Feagaiga Fou: Mataio 5: 1-12  
Matua: Kenese 2: 8, 15.

f.8: “Ua faia foi e le Alii le Atua o le faatoaga i Etena i Sasa’e, ona ia tuuina lea i lea mea o le tagata na na faia.”

f.15: “Ua ave foi le tagata e le Alii le Atua ma tuu ia te ia i le faatoaga i Etena e galue ai ma leoleo ai.”

A tuu faatasi fuaiupu ia e lua ona faitauina lea faapea:

“UA FAIA FOI E LE ALII LE ATUA O LE FAATOAGA I ETENA I SASA’E,UA AVE FOI E LE ALII LE ATUA O LE TAGATA NA NA FAIA, MA TUU I LE FAATOAGA E GALUE AI MA LEOLEO AI.”

**Manatu Autu o le Vaiaso:**

“Latalata i le fatu o le Atua i le faatoaga.” - *Nearer God’s Heart in a Garden.*

**Manatu Autu o le Aso Sa:** O le faatoaga o le loto. *The Garden of the Soul.*

E lua ni vaega tetele ua vaevaeina iai le matua:

Vaega 1: Ua faia foi e le Alii le Atua o le faatoaga i Etena i Sasa’e. O le a foi leni faatoaga ua faia faapitoa? O le a sona faamoemoe? A o se faifaato’aga ea le Atua?

E sili atu i le faifaato’aga le Atua. Aua o ia o le Alii o le faatoaga na ia foafoaina ma faia le lalolagi mai le leai o se mea. Seia oo ina tuulaupua ma tuumatamaga mea uma. Na ia faia faapitoa le faatoaga ma

faaigoa o Etena. O lona uiga o le fiafia e tupu ai foi le olioli; o le itu i Sasa’e i le mea e oso a’e ai le la.,

O le faamatalaga o le faatoaga o se faatoaga e matua manaia ma matagofie. E ola lausiusi ma ola lanumeamata laau uma. E fua tele ma fua fetiitii. E oo lava i laau teufanua e felanulanua’i. E faasusuina e le vaiatafe e tasi na tafe atu iai ona ala eseese lea ma avea ma vaiatafe e fa. O le igoa o le tasi o Pisona: e faataamilomilo lea i le nuu uma o Havile, e iai auro lelei, o petala ma maa soama.

O le igoa o lona lua o vaiatafe o Kaiona, e faataamilomilo i le nuu uma o Kusa. O lona tolu o vaiatafe o Hitekulu e tafe atu i sasa’e o Asuria. O lona fa o vaiatafe o le Eufirate lea. E matua tamaoiga le faatoaga aua e faasusuina pea ma sulua e le la. E lausiusi ma lauolaola ma fua tele mai.

**Vaega e lua o le matua:** “Ua ave foi e le Alii le Atua o le tagata na na faia, ma tuu i le faatoaga e galue ai ma leoleo ai.”

Ua manino le faamoemoe na faia ai e le Alii le Atua le faatoaga i Etena. E le mo ia. E mo le tagata. Le tagata na faia e le Alii le Atua. Ia latalata i le fatu o le Atua i le faatoaga.

Na faia e le Alii le Atua ia laau uma mai le elelele (Ken. 1: 11) Na faia foi e le Alii le Atua o meaola uma mai le elelele (Ken. 1: 24).

Na faia foi e le Alii le Atua o le tagata mai le efuefu o le elelele, ma na manava i ona pogaiisu o le manava ola, ona avea ai lea o le tagata ma tagata ola (Ken. 2:7)

O le tala i le Fofoaga - ua tutusa lava le tagata ma laau ma meaola, na foafoaina e le Alii le Atua mai le palapala.

Peitai, ua sili atu le tagata nai laau ma meaola. Ua faia e le Alii le Atua o le tagata i lona faatusa ma ‘ia foliga ia te ia. Ua tu matilatila, maualuga le tagata ina ua manava iai e le Atua i ona pogaiisu o le manava ola. Na mafua ai ona avea le tagata ma tagata ola. O le mealofofa taua lea a le Atua mo lana tagata e le mafai ai ona motusia le fesoota’iga ole tagata i le Atua poo le Atua foi i le tagata. A o le uiga lea o le fuaitau: UA FAIA LE TAGATA I LE FAATUSA O LE ATUA. O le sootaga vavalalata; ola mafuta; ola fesoota’i. E le o le uiga o ia upu ua iai lea i le Atua se tino faapei o le tagata. A o lona uiga ua faia ia Mafuta, Fesoota’i ma ia Vavalalata.

O le tagata na te faaauuina galuega atia’e, na amata e le Atua, teuteu e le tagata, faalelei, faamatagofie, faatumauiina lona manaia. Ia atagia foi i le tagata foliga mamalu ma le paia o le Atua i lana amio ia lelei i le itu faaleagaga. Ia ola faapaiaina. Ia ola mata’u, ava ma migao, fefe ma mata’u i le va tapuia, le va malu ma le va feagai ma le Atua Silisiliese.

O le manatu autu la o le AsoSa: **“O le faato’aga o le loto.”** Ua faatatau lea i le tagata i le va feagai ma le Atua. E leai se loto o se laau - e pule ai le tagata. E leai foi se loto o se



---

# Lauga EFKS TV Aso Sa

meaola- aua e faamate pe faalalo lava e le tagata.

O le tagata o le palealii lea o *mai le itulau e13*

le Fofoaga pa'ia a le Atua. Ua faasililiina e le Atua le tagata i lo laau ma meaola.

O le upu moni, o le Atua lava na na faia le tagata i lona foliga ma lona faatusa, o le Atua foi na ia faia le faatoaga i Etena ma tuu iai le tagata. E le'i tuuina e le Atua le tagata i le sami poo le vanimonimo. E leai. O le faatoaga i Etena. Mo le faaaauina o le ola matagofie ma le faatumauina o le lelei, o le tiute lea o le tagata. A o le tagata na faia i le faatusa ma foliga mamalu o le Atua e tatau foi ona a'oa'oina ma faatonu. E le taumate o le pogai lea o le iai i totonu o le faatoaga o le laau o le ola ma le laau e iloa ai le lelei ma le leaga. Faatasi ai ma le faatonuga: 'Aua nei aai ai, aua e malaia ai ma oti ai. O se faamanatu taua lea mo le tagata. Ia vaai i le laau ma a'oa'oina. Faalogo ma usitai - E manuia. Ia iloa le Atua i taimi uma. Ia iloa i le matagofie o mea na ia faia. Ia iloa i le vaai atu i le siosiomaga. O se faamanatu taua foi aua o lea ua faailoa e le Atua. E iai le mea e gata ma muta ai le malosi faale-tagata. O tala mai ma tua atu - o le Atua lea. E iai le laina tuaoi o le saolotoga e le tuufauina le tagata. Ia ola fiafia ma olioli i mea ua maua. Ia faamalieina le loto i mea ua foaiina. Ia manino ma malamalama, o le Atua na na faia, o le Atua foi na ia foaiina mo le tagata.

Faatoaga o le loto - o le

faatoaga a le Atua. O lana tagata faapelepele. O le upu Eperu o le "NEPHESH" ua faaliliuina i le gagana Peretania o le 'soul', ae faa-Samoaina o le 'loto', ua faamatalaina ai le tagata i lona atoaga. O lona sootaga i le faatoaga i laau ma meaola ona o lona tino na faia a'i mai le palapala, e usitai foi lona tino i le natura o le fofoaga e pei o meaola.

O le meaola lava le tagata, peitai e sili atu i lo meaola i le iai o lona mafafau (fai'ai) ma lona agaga (soul poo le loto).

Faatoaga o le loto - Ua faaaogaina soo le upu loto i nei ona po ua pei o se nofoaga o "lagona" e puna a'e ai le fiafia, faanoanoa, le ita, alofa, etc. etc. Ae le faapena le faaaogaina i le gagana Eperu. O le "loto" o le upu faasalalau lea mo le OLA TUTOTONU atoa o le tagata, o lona uiga o mea uma ua avea ai o ia ma tagata. O lenei Ola Tutotonu atoa o le tagata e ao ina liliuina i le Atua ma faaavanoa mo le Atua. Ia pulea e le Atua, a'oa'o, a'oa'i, faatonu, faasino ma tapasa e le Atua. Afai e taumafai se tasi ma le loto naunauta'i, loto faamaoni, loto atoa e su'esu'e ma sailiili ia iloa sina mea na te mafaia ona iloa e uiga i le Atua ma taumafai e faaali atu mea uma ua ia a'oa'oina i le faalologo ma loto maualalo, usiusita'i ma tuuina atu le ola e auauna ai ma le faamaoni - o le a le pine ona oo mai i le tagata le agaga tonu e fesoota'i atu ai i le Atua. E mafanafana ai le ola mafuta e ala i le tatalo.

E saga faaosofia ai pea le loto

e tapuai i le Atua i le agaga ma le faamaoni. E vaai le tagata i le tino a o le Atua na te silafia loto uma. E fua mai e le laau fua e tatau ma lea ituaiga o laau. A o le tagata e iloa i ana mea e fai, o ana galuega, o lana gagana, o lana amio, o le tu, savali, nofo, mea uma o i totonu o lona loto.

O le tele o faalavelave matuia ma le mata'utia o aafia ai le lalolagi, o le loto lava o tagata le faapogai. Sauaga i totonu o aiga, soliga tulafono eseese, mataupu i suafa matai ma tua'oi ma le pule i fanua - o le loto lava. Mana'o tele, matape'ape'a, tu'inanau, le faamalieina, leai se alofa, loto faaususili, loto faamaualuga, loto taupulepule ma faufau leaga, loto fia taui ma sui.

E lelei ina to'ilalo, ae iloa ona salamo. O Tavita i lana Salamo e 51: "Le Alii ia e faia se loto mama mo a'u ma ia e faafouina se loto mau i totonu ia te au." E le teena e le Atua le loto ua iloa le mea e tatau ona fai ma ua salamo.

Fetai le Atua, "Ou te nofo i le mea maualuga ma le pa'ia, ma te nonofo foi ma le ua momomo ma ua maualalo lona loto, e faamafanafana i e ua loto maualalo ma faamafanafanaina o loto o e ua loto momomo."

Afio mai o Iesu i le lalolagi e le gata o ia o le Mesia na valo'ia, a o le Keriso ua faauina. O le Faaola foi mo le lalolagi agasala. A o ia lava o le Atua ua ia te'i tatou poo le Emanuelu (Mataio 1:23). Ua afio mai e fonofono sootaga ua motusia ina ua toilalo le uluai tagata. Toe faalelei le mafutaga ma le Atua ina ua satia e le agasala ma

---

# O E UA MALILIU

## Rasela Taefu Mata'i

10 Fepuari 1933 - 7 Aokuso 2014

O le tina tiakono ua maliu ina ua ova ma le 81 ona tausaga. Sa avea ma faletua o le A'oa'o Fesoasoani mo tausaga e 42, mulimuli ane ona toe galue lea mo tausaga e iva ma masina e fitu o se tina tiakono.

O se tina e loto tele i le tautuaina o le finagalo o le Atua, aua e le gata o le faatinoina o

lona tofi tiakono, ae taulamua i le faamaopoopoina o le Mafutaga a Tina, tainane i lona soifua fai taulaga ma le agalelei i le faifeau ma le aiga.

E maliu le tina o ia galue foi o le Komiti Suesue a le Ekalesia i le itupa o tina, ma o se tina e toaga i soo se sauniga lotu, i la matou aulotu, i le Pulega ma le Matagaluega, oo lava i le Fono Tele i soo se sauniga e faia.

O lona toe sauniga sa faia i le Aso Faraile 15 Aokuso i le 10am i le EFKS i Si'ufaga. Sa

ou ta'ita'i, faitau le Tusi Paia, faia le molimau ma le upu mulimuli e faatofa atu ai i le tina i lona oliolisaga tumau. O le faifeau ia Oteta Taulealo na molimoli mai le sa i totonu o le malumalu, ma faia le tatalo, a o Caesar Samuelu FS sa ia faia le upu faamafanafana.

"A o le faamaumau lona ola ona o a'u ma le Tala Lelei, e faasaoina o ia."

Rev. Opapo Soana'i Oeti,  
Faifeau EFKS Siufaga  
Falelatai

---

## Lauga EFKS TV Aso Sa

sofofa e le tiapolo.

O ana a'oa'oga sa faaautu lava i le tapenaina o le loto aua o le malo o le Atua o le faatuina e le pei o le malo o Metai ma Peresia, Asuria poo Peretania, Amerika po Saina. A o le malo e faatuina i loto o tagata uma - Amerika, Peretania, Saina, Iapani, Korea, Samoa.

Faatoaga o le loto, o le faatoaga mo le malo o le Atua. O lona Alii Sili ma lona Faaao o Iesu. Na ia faailoa i lona soifua paia le uiga moni o le avea ma tagatanuu o lona malo.

O le Faatoaga i Etena na pa'u ai le uluai tagata. A o le faatoaga i Ketesemane na afutoto ai le Alii i lana tatalo: "Lo'u Tama e, 'aua le faia lo'u loto a o lou finagalo."

Na ia afio mai i le lalolagi ma ia faia le finagalo o le Tama. Fai mai Paulo: "...e le'i manatu o ia o se mea e uumau lona tulaga tutusa ma le Atua, a ua sasaa atu o ia e ia lava, o fai

mona le uiga o le pologa, i lona fanau mai faapei o tagata. A o iloa o ia i ona foliga e faapei o se tagata, ua faamaualalo o ia e ia lava, ua na 'ana'ana ua oo ina maliu, o le maliu lava lea i le satauro. O le mea lava lea ua matua faaeaina ai o ia e le Atua, ma foaiina atu ai ia te ia o le suafa e silisili i suafa uma lava, ina ia tootuli o tulivae uma lava i le suafa o Iesu, o e oi le lagi, ma e oi le lalolagi, ma e oi lalo o le lalolagi, ma ia ta'uta'u atu e laulaufaiva uma lava o Iesu Keriso o le Alii lava ia, ia i'u ai i le viiga o le Atua le Tama.

O le fe'au o le Tala Lelei - ia fai oe, ia fai a'u, ia avea tatou ma laau lausiusi lau olaola ma fua tele mai i le lalolagi i si pa'usisi, le vaipanoa oloo e soifua ma ou ola ai, auauna ma tautua ai. E le gata i totonu o aiga, nuu, a o galuega, sosaiete, faalapotopotoga, aemaise o le malo ma le lotu.

Poloa'iga faa'auro a Iesu e pei

ona faamauina e Mataio: "Ia outou o ma papatiso atu i le suafa o le Tama ma le Atalii ma le Agaga Paia." Ta'utino foi lona le tuua o tatou. "Ou te ia te outou i aso uma lava, e oo i le gataaga o le lalolagi.

'Aua ne'i galo - e vaai le tagata i le tino, a o le Atua e silasila i le loto.

O le Faato'aga o le loto.  
Ia soifua ma ia manuia.

---

## Ou te manumanu ia oe ae le o le taavale

Faato'a lua aso talu ona faatau le taavale fou a le fafine e lona toalua. Ona alu ai lea e faatau. E le'i oo i le faleoloa ae so'a e le fafine le isi taavale, ma'omo'omo ai. Ua fefe le fafine i lona toalua. Ua autago solo e su'e le 'ato o iai pepa o le inisiua o le taavale, e tatala atu, o le pepa muamua lava na tau atu iai oloo tusi ai upu nei i le tusilima a lona toalua:

"Manatua, a lavea le taavale, e le afaina. O oe ou te manumanu iai, ae le o le taavale."

---

# O E UA MALILIU

## **Maria Koleti Kupa**

16 Iulai 1952 - 1 Fepuari 2014

O le faletua o le A'oa'o Fesoasoani. Na soifua mai Maria i le aso 16 Iulai 1952, ae faamanavaina e le Atua ana galuega i le aso 1 Fepuari 2014.

O lona tama o Maiava Ti'e Maiava o Faleula, a o lona tina o Telesia Ulugia Niulevaea o Faleula lava. Na faaipoipo atu ia Vui Moemai Kupa i le aso 21 Tesema 1974.

Sa faatiakonoina i la'ua i le 27 o Iuni 1987 i le vaitaimi o Fareti Timaloa FT. Sa manuia ma avea ma A'oa'o Fesoasoani ia Ianuari 1997, ma tautua ai i le tofi se'ia valaau lona Alii. Ae tuua ai le tama o le aiga. E to'afa o la alo; ae to'afa foi fanau a fanau. E to'a valu e na

tutupu mai ia te ia.

E valaauina e le Atua le tina, ua maua lana taulaga ola i le Atua; e ala i le alii a'oa'o i'u mai Malua, o Samasoni Kupa.

O le tina sa galue punoua'i i totonu ole Ekalesia i le Mafutaga a Tina, Aufaipese, ma le Autalavou. O se tina e galuegugu. E fai mea fiafia ma loto maulalo. E tutusa ia te ia tagata uma. E le faailoga tagata. E le faaalua lava sona finagalo i ni fonotaga a le aulotu. Ae fiafia lava i se mea ua iu iai se mataupu. Sa asiasi atu i Ausetalia i se taimi pe lima tausaga. Peitai na toe fo'i mai lava matou galulue i le aulotu e pele ia te ia.

O lona sauniga faale-aiga sa ou ta'ita'ia. O le Susuga i le A'oa'o i'u mai Malua, Samuelu Misionare na saunia le upu faamafanafana. O Ata Milo FS

na molia talosaga, faapea le tele o molimau i le soifua galue o lenei tina.

O lona toe sauniga i le aso 8 Fepuari 2014 sa faia lava i le Penieli nei, le malumalu e pele ia te ia. Sa ou ta'ita'i ma faia lona molimau faale-Agaga. O le alii faifeau ia Misionare Richard Noaese FS sa feagai ma le upu faamafanafana. O talosaga sa saunia e le faifeau nofoaiga ia Lokeni Fuatagaumu FS. O le Tusi Paia sa faitauina e le alii A'oa'o i'u mai Malua, Ata Lemana.

Na faaiu i lona oliolisaga tumau i le fanua maliu i Mangere Lawn Cemetery. Faatofa atu ai i le pese, Talofa uso, tofaina oe. Manuia lau malaga tina. Amuia e ua oti, e oti o i le Alii.

Rev. Naketua Talagi FS,  
EFKS Onehunga, Niu Sila.

---

## **Lupematasila Taulaga Palu**

27 Novema 1938 - 10 Mati 2014

O se tasi o tama matua o le Ekalesia ma o le faaaloaloga o le nuu i Si'ufaga, ua tuumalo i lona 76 tausaga ina ua 21 tausaga o lona tofi tiakono, ae ua 20 ai lea o tausaga o la ma mafutaga i le Ekalesia ma le nuu.

O se tiakono ma se tama loto maulalo, to'a filemu, loto alofa ma agalelei i soo se tasi e manaomia se fesoasoani. E le sii soo a o lana tofa loloto sa faamalosi'au i galuega uma na faatino a le Ekalesia. E pei o le

fausiaina o le fale o le faifeau, o le hall, seia taulaga lana tautua i le lagolago malos i le fausiaina o le malumalu. O se tama e talitonu i le Atua ma ana faamanuiaga i le ola tautua, aua e fiafia i le ola fai taulaga, ma alofa foa'i i soo se faifeau, aemaise lava i la matou mafutaga.

O lona sauniga faale-aiga, sa ou ta'ita'i ma faia le upu faamafanafana, a o lona toe sauniga i le Aso Lulu 19 Mati i le EFKS i Siufaga, sa ta'ita'i ai le Susuga i le Toeaina Faatonu ia Tautiaga Senara, tatalo Simeona Taefu FT, lauga Caesar Samuelu, Tusi Paia o le Susuga ia Oteta Taulealo a o a'u na faaulufaleina lona sa, faia le

molimau ma le taitaiina o lona toe sauniga i lona oliolisaga tumau i lona maota i Siufaga.

“Amuia lea auauna e maua mai e lona Matai oloo faapea ona fai.”

Manuia lau malaga.

Rev. Opapo Soana'i Oeti  
Faifeau. EFKS Siufaga,  
Falelatai

## **Husband and Wife**

**Let the wife make  
the husband glad to  
come home, and let  
him make her sorry  
to see him leave.**

*Martin Luther*

---

# O E UA MALILIU

## AILOLO LIAINA

15 Aokuso 1943 - 18 Aperila 2014

Na soifua mai Ailolo i le aso 15 Aokuso i le tausaga e 1943, ae na faamanavaina e le Atua ana feau i le Aso Faraile 18 Aperila 2014, o le Aso Malii foi lea i lenei tausaga, ina ua 70 o ona tausaga ma nai masina. O ona toe sauniga sa faia lava i lana Ekalesia sa tautua ma galue ai mai lona tupu ae le Ekalesia EFKS Laulii.

O a'u lava sa ta'ita'i, ae o le Susuga i le Faifeau ia Kolia Matamu na fa'aulufaleina mai le sa o le Afioga i le Tiakono i le falesa. Ae o le faifeau ia Faafetai na lauga. O le faletua o le faifeau mai le Ekalesia Tokelau ia Sia Satalo Silila, o se alo foi e faasino i le Afioga i le Tiakono ia Ailolo Liaina na fai ma sui o le fanau e molimau i le mafutaga ma le tamā. Ia o le molimau o se tamā e le soona gaioia, ae ote lava o le alofa i le fanau. E naunau lava lona loto i lana fanau ona o le tausiga o lona tinā o soifua mai pea aemaise ai o lana tautua i le Ekalesia e ala i lona tofi tiakono. O le tamaitai ia Faitala Leo sa fai ma sui a fanau a fanau, ae o lona uso ia Talimalie Faaaoga na fai ma sui o ona uso ma tuafafine. O se tagata e le iloa pe ita i se isi ae naunau lava lona loto e fai mea lelei mo lona

aiga. O le Afioga i le Tiakono ia Leitufia Faamati o le saó foi lea o lona aiga na molimau i le tautua a le Tofa Ailolo Liaina i lona aiga. O se tamā lava ua loa ona matai ma sa tautua mai lava ma le faamaoni i le aiga e oo mai ina valaau le Matai. O a'u lava foi na faia le molimau i le soifua faa-le agaga o le Afioga i le Tiakono, ma sa fa'aautu le molimau i le manatu autu o le tusi o le Au Leoleo i le vaiaso "o le faamoemoe o le ola." I le tusi faitau o Failauga e 12 o loo faapea "ia e manatua le na faia oe i ona po o lou taulealea."

Auā o se tamā sa faaaogaina lana taleni o le ta piano e tautua ai i le Atua i tausaga o lona malosi e ala i le aufaipese. Aemaise ai o loo maua i faamaumauga o le aso 7 o Iulai i le 1979 na faaipoipo ai, ae o le aso muamua o Aokuso i lea lava tausaga na ekalesia ai. Ae o le aso 3 Aokuso 1984 na faaetia ai lona tofi tiakono, ma e le itiiti tausaga o le tautua ma le auunaga. O le fa'amoemoe lea o lona malosi ma lona ola ia viia ai lona Matai, aemaise ai ia iloa e lana fanau lea lava foi faamoemoe i lo latou soifua ai i le aiga, aemaise o le Ekalesia ma le Talalelei. Faatoa tu'u lava foi lona feagai ai ma le tautuina o le Faamanatuga ina ua faigata lava e ona 'a'ao le aga'i mai i luma o le La'o'ai. E le se tagata e sii soo lona sa, e le malosi foi sona tamāoiga, ae e iloga lava

ana feau i le Ekalesia. Soo se taimi lava foi e asiasi atu iai i lona maota e tataua lava ona tuu mai se tupe, e fiu foi e fai iai ae le mafai lava lona fia fai mea lelei ma lona naunau i lana lava masani o le alofa foai. O a'u foi lava na ta'ita'i i ona toe sauniga i le tu'ugamau, ona matou faatōfā ai lava lea i le pese faatōfā a le au Kerisiano, Tofa Tama, manuia lau malaga

Pita Toleafoa

E.F.K.S LAULII

---

## PESETA TAUNESE KITONA FIAVAAI.

Na soifua mai Peseta Taunese i le aso 17 o Novema 1946 i Orokoru i Papua Niu Kini, a o galulue faamisionare ai ona matua o Fiavaai ma Elisapeta, ae na faamanavaina e le Atua ana feau i le Aso Toonai aso 2 o Aokuso i lona aiga i Laulii. O ona toe sauniga sa faia lava i lana Ekalesia sa tautua ma galue ai e oo i le taimi na valaau mai ai lona matai.

O au lava sa ta'ita'i, ae o le faifeau ia Kolia Matamu na fa'aulufaleina mai le sa o le tina i le malumalu mo ona toe sauniga. O le faifeau ia Livigisitone Fiavaai na fai ma sui o ona uso ma tuafafine ma

*faaauau itulau e sosoo ai*

---

# ATA O E UA MALILIU



**Maria Koleti Kupa**



**Rasela Taefu Mata'i**



**Lupematasila  
Taulaga Palu**



**PESETA TAUNESE  
KITIONA FIAVAAI**

fanau e molimau i le soifua o le tina i lona aiga. Ae o le A'oa'o Fesoasoani ia Leaana mai Moata'a sa fai ma sui o aiga o lona tinā, faatasi ai ma le Tiakono o le Ekalesia Katoliko ia Ati Tuivasa Ati, e fai ma sui o le aiga o lona tamā. Ma e taga tutusa uma molimau ia i le uiga manaia faa-le Atua sa soifua ai le tinā, o se tagata osi aiga, o se tagata e alofa i ona aiga. O lona uiga lava lea na ou fai atu ai, e iloa lava i tagata o e sa fai ma molimau, o faigaluega a le Atua, auā sa molimau i meaalofa faa-le Atua sa soifua ma ola ai le tinā ia Peseta.

Sa fa'aautu foi le molimau faa-le-agaga i le upu e faapea a Iesu, ".....e te le iloa ea e tatau ona ou iai i le fale o lo'u tamā?" Aua foi o loo maua i faamaumauga o le tausaga e 1983 ia Iuni na malaga mai ai mai Niu Sila ma le tamā o le aiga ia Leitufia Ioane ma lo la tofi tiakono mai le Ekalesia PIC, faatasi ma le tusi faamaonia mai i le faifeau ia Leuatea Sio ma faaaoga ai loa ma tautua ai i le Ekalesia i Laulii seia oo ina maluu le tamā. Sa soifua i Papua, sa iai foi taimi sa aumau ai i Niusila, sa iai nisi taimi i lona aiga i Moata'a, faatasi ai ma le galuega sa nonofo tumau ai i Sogi, ae sa agai mai lava i lona aiga i Laulii ma lana Ekalesia sa tautua ma galulue ai. O lona uiga lea o lo'u manatu i le upu ua fai ma autu ole molimau. Auā foi o fea lava le tele o mea na agai iai, ae sa manatu mai lava i lona aiga, lea ua agai atu i lona aiga ma le

maota o lona tamā e nonofo olioli ai e faavavau. O le Fesoasoani o le Ekalesia Katoliko Roma na saunia le upu faamafanafana, ona matou faaiu ai lea i sauniga i lona oliolisaga tumau. O a'u lava sa ta'ita'i i le tu'ugamau ona faatofa ai lea i le pese faatofa a le au Kerisiano

Tofa Tinā manuia lau malaga

Pita Toleafoa

E.F.K.S LAULII

Fear not  
tomorrow,  
for God is  
already  
there.

Author unknown